

Llingua asturiana y Universidá d'Uviéu: cuatro sieglos de rocea

por XULIO VIEJO FERNÁNDEZ

D ENDE la so fundación en 1608, la Universidá d'Uviéu nun foi ayaña al devenir históricu de la llingua asturiana, tanto dende'l punto de vista de l'estudiu, que-y ye propiu, como dende'l de la creación lliteraria. Efectivamente, dambos aspectos pueden empezar a rastrexase precisamente dende'l momentu en qu'esiste una actividá universitaria en territoriu asturianu neses primeres décades del sieglu XVII y ye razonable postular ente ún y otru fechu una rellación causa-efectu.

Si ye la reflexón erudita al rodiu de la llingua, afáyase yá un discursu definíu sobre ella, bien ye verdá que dende bases precientífiques, na figura d'un de los sos primeros profesores, el xesuita Luis Alfonso de Carvallo (1571-1635), historiador y preceptista lliterariu que na so obra histórica *Antigüedades y cosas memorables del Principado de Asturias* ufierta yá un carrapiellu d'idees sobre la *lengua asturiana* (términu qu'él mesmu emplega, xunto a *asturiano*, baxo la forma castellana correspondiente), enxertu nel marcú más xeneral de la historia local¹. Ye,

¹ Analicé ese tipu de testimonios en «Sociolingüística y lliteratura asturiana nel sieglu XVII», en *La lliteratura asturiana nel cuarto centenariu d'Antón de Marirrevera*, Uviéu (Trabé), 2001, páx. 27-48.

sicasí, llamaritivo, qu'estes alusiones d'Alfonso de Carvallo a la llingua nun se presenten nes primeres versiones manuscrites de la obra (culminada contra 1613), sinón na versión definitiva que recueye la so edición póstuma de 1695. Ello falaría quiciabes d'un progresivu maurecimientu de les idees llingüísticas asturianistes del padre Alfonso de Carvallo nos últimos años de la so vida (si nun tien que se pensar n'otru redactor distintu), que probablemente pudieren xuncise al creciente dinamismu qu'al rodiu del asturianu quier albidirase per aquellos años.

Esto diz bien col emerxer de la lliteratura asturiana pela mesma época y, precisamente, en mesmu entornu universitariu uvieín, nel que yá pací algamar cierta sonadía y reconocencia'l primer autor conocíu (Aritón de Marirreguera)⁸ ente lo que yera una xeneración d'escriptores más amplia anque malapenes conocida al traviés de la escueta referencia d'Andrés Mendo a cuenta de los xuegos florales de 1639, afayada de recién por Pilar Fidalgo⁹.

Sia que non, l'incipiente discursu eruditu sobre l'asturianu y la difusión de los primeros testos lliterarios nesta llingua n'ambientes universitarios ye bien a esplicar que l'asturianu sia oxetu d'atención y estudio (y de creación poética) na valiosa xeneración ilustrada que xorreret n'Asturies nos últimos décades del sieglu XVIII y primeres del XIX encabezada por Gaspar Melchor de Xovellanos y el so intímu amigu Carlos González de Posada, responsables de los primeros planteamientos científicos sobre esti asuntu.

La recuperación d'esti bagaxe eruditu y lliterariu de parte de Xosé Caveda y Nava en 1839, tres del tronzamiento d'estes primeres xentes

⁸ Véase la mtra «Introducción» a ARIÓN DE MARIRREGUERA, *Fábulas, mitos y romances*, Uviéu (Aukizosas Llibros), 1997, págs. 11-12.

⁹ Pintor, FIDALGO PRADA, «Lletres Vieyes», *Llerres Asturianos*, 79 (2002), páx. 123, n. 2.

asturianistes pola Guerra d'Independencia Española y los sucesos que siguieron darréu, supunxo nes décades centrales d'esta centuria un emburrión decisivu a la llengua asturiana nestes dos facetes que se vienen considerando: la erudita y la literaria, que conocen de magar un xorrecimientu significativu de textos de distintu valir. Ello, en marcu d'un importante desarollu nestos años de los estudios llingüísticos en xeneral y romanísticos en particular, determinó los primeros planteamientos espícitos tocantes a la conveniencia d'un estudiu universitariu de la llengua.

Efectivamente, nun momentu nel que los estudios sobre l'asturianu multiplicáronse dientro y fora d'Asturies y d'España, Gumersindo Laverde Ruiz, llaniscu catedralgu na Universidá de Santiago de Compostela, foi'l primeru n'encañentá la creación d'una cátedra de *lengua bable* na d'Uviéu, mesmu que la revitalización del vieyu proyeetu xovellanista d'una Academia Asturiana «que centralizando las luces y observaciones de las personas entendidas de todo el Principado determinara las leyes gramaticales de nuestro dialecto e hiciera el inventario etimológico y razonado de su riqueza léxica». Al propiu Laverde débese-y, arriendes de delles publicaciones d'orientación xeneralista (tal como l'artículu tituláu «Dialecto asturiano», asoleyáu na revista *La Ilustración Gallega y Asturiana*), la que tien que se considerar la primer monografía dialektal del nuesu dominiu llingüísticu: los «Apuntes lexicográficos sobre una rama del dialecto asturiano», publicaos nos números 2 y 3 de la *Revista de Asturias* ente 1879-1880, dedicaos a la habla de Llanes, nun modelu d'estudiu que, abondosamente continuáu nes sos trazos esenciales hasta los últimos años, constitui ún de los principales bagaxes investigadores de la Filoloxía Asturiana.

¹ GUMERSINDO LAVERDE RUIZ. «Apuntes lexicográficos sobre una rama del dialecto asturiano». *Revista de Asturias*, vol. II, Uviéu, 1879, págs. 369-373.

Les propuestes de Laverde foron, de primeres, acoyíes con simpatía ente parte de la intelectualidá asturiana de finales del sieglu XIX, anque nun llegaron a cuayar en proyectos sólidos, magar dalguna tentativa⁵. Sia como quier, el rector de la Universidá d'Uviéu de per aquellos años, Fermín Canella y Secades, participaba d'estes esmoliciones y constituyóse en principal validu de los estudios asturianistes, nel sen más ampliu.

Canella ye'l cabezaleru del grupu d'investigación conocíu como *La Quintana*, dedicáu sobremanera a estudios de tipu folklóricu, dientro de los que s'enxerten los tocantes a la llingua popular. Nesti ámbitu, Canella publica dellos artículos (ente 1882-83, «El dialecto asturiano», nos números 5 y 6 de *Revista de Asturias*, prácticamente reeditáu col títulu «El bable», dientro del llibru *Estudios Asturianos (Cartafueyes d'Asturias)*, de 1886) o reedita, ampliándola, l'antoloxía poética de Caveda de 1839 (en 1887), arriendes d'otres publicaciones ya iniciatives. En mesmu ambiente intelectual trabayer, amás, otres persones, sobremanera n'ámbitu de la lexicografía, casu d'Apolinar de Rato (que publica'l so diccionariu en 1891)⁶, Julio Somoza (autor d'un diccionariu fecháu contra 1896, bien qu'ensin espublizar hasta un sieglu depués)⁷, o, como autores de vocabularios dialectales, Braulio Vigón⁸ y Bernar-

⁵ Por casu, la obra de José Arias de MIRANDA, «Diferentes estudios para una gramática y diccionario bable», manuscrito remanáu y citáu por CANELLA (*Estudios asturianos*, pár. 14.4), por aciu del que se conocen dellos conteníos.

⁶ APOLINAR DE RATO Y HEVIA, *Vocabulario de palabras y frases bables que se hablaron antigüamente y de las que aun hoy se hablan en el Principado de Asturias, seguido de un compendio grammatical*, Madrid, 1891, con una temprana reseña de BERNARDO ACEVEDO Y HUELVES na *Zeitschrift für romanische Philologie*, 20 (1896), páx. 105-109.

⁷ JULIO SOMOZA, *Primer ensayo de un vocabulario bable o dialecto de los naturales de Asturias*, ed. de Alvaro Arias Cabal, Uviéu (Academia de la Llingua Asturiana), 1996.

⁸ BRAULIO VIGÓN, *Vocabulario dialektológico del concejo de Colunga*, Villaviciosa, 1896, con segunda edición como anexu de la *Revista de Filología Española*, anexo 63, Madrid (CSIC), 1955. La primer edición fui oxetu de reseña por AKE WILSON MUMTHÉ, «Ein neuer Beitrag zur

do Acevedo y Huelves (*Diccionario del habla de occidente, asoleyáu póstumamente en 1932*¹ y daveres relativu al gallego-asturianu)².

Dellos otros personaxes de la vida universitaria asturiana caltienen tamién un protagonismu relevante nel entornu de la llingua neses últimes décades del XIX, casu del tamién rector (ente 1888-1905) Félix Aramburu y Zuloaga, fundador de la *Revista de Asturias*, poeta y traductor d'Anacreonte al asturianu, o del secretariu xeneral de la institución José Fernández Quevedo, conocíu tamién como poeta bajo'l nomatu de Pepín Quevedo, o d'otros nomes como Marcelino Flórez de Prado y, daqué más tarde, el propiu Valentín Andrés Álvarez, tamién con obra lliteraria n'asturianu. Nun tienen que se faer de menos tampoco les intervenciones, más o menos controverties, nos alderiques llingüísticos d'otros personaxes fundamentales de la nuesa universidá como Leopoldo Alas *Clarín*, que, otra manera, paez ser el contactu académicu n'Asturies del filólogu suecu Munthe a la d'entamar la so monografía dialectal sobre l'asturianu suroccidental³, al tiempu que fai les veces de valedor de poetes como Tiadoro Gómez o'l citáu Pepín Quevedo⁴.

Kenntnis der asturischen Mundarten», *Zeitschrift für romanische Philologie*, 23 (1899), páx. 321-325, y la segunda por LORENZO ROMBÍQUEZ CASTELLANO, *Boletín del Instituto de Estudios Asturianos* 27, (1916), páx. 199-260.

² BERNARDO ACEVEDO Y HUELVES y M. FERNÁNDEZ, *Vocabulario del habla de occidente*, Madrid (Junta para Ampliación de Estudios e Investigaciones Científicas), 1933, reseña de ERNST KÖTTNER, *Volkstum und Kultur der Romanen*, 7 (1934), páx. 371-372.

³ Un repòs a esta rica xera lexicográfica faiu ÁLVARO ARIAS CABAL, «La lexicografía asturiana. Cronología de doscientos años d'intentos», *Lectura Asturiana*, 60 (1996), páx. 41-63.

⁴ Trabayu residirán en castellán, un sieglu depués, pola mesma universidá (ÁNGEL WISOM MUNTHE, *Anotaciones sobre el habla popular de una zona del occidente de Asturias*, Uviéu (Universidá d'Uviéu, Biblioteca de Filología Asturiana, 1), 1987).

⁵ Los acordes y el papel xugiu por Clarín nel alderique sobre l'asturianu analizalu XOSÉ LUIS GARCÍA ARIAS, *Bable y regionalismo*, Uviéu (Conceyu-Babie), 1975.

Sicasí, lo que ye un estudiu científicu y sistemáticu de la llingua asturiana nun respuende, de primeres, a una iniciativa entamada propiamente dende la Universidá d'Uviéu, sinón más bien dende'l Centro de Estudios Históricos de la de Madrid, afalada fundamentalmente por Ramón Menéndez Pidal, cabezaleru d'una espléndida promoción de filólogos españoles ente los que se formen los asturianos Lorenzo Rodríguez Castellano (responsable de les encuestes del ALPI en territoriu asturianu, arriendes d'otres obres posteriores) y María Josefa Canellada, que ye la d'iniciar, desque acabada la Guerra Civil, una fecunda serie d'estudios monográficos sobre la dialectoloxía asturiana col so *El bable de Cabranes* de 1944¹, ensin faer de menos otres notables contribuciones tanto dende'l punto de vista de la investigación filolóxica como dende'l de la creación literaria².

Pero va ser esti xéneru de la monografía dialectal el que prienda de manera definitiva na Universidá d'Uviéu los estudios al rodiu de la Filoloxía Asturiana, de mano siguiendo la marcha de la dialectoloxía tradicionalista (d'aínde la obra d'autores como Jesús Neira o Manuel Menéndez García) y darréu al abelugu de les corrientes estructuralistes que zorrecen na Facultá de Filosofía y Lletres d'Uviéu dende los años 50 y 60 del sieglu XX y quে dexen nos estudios asturianistes un valiosu bagaxe d'obres cola firma d'autores como Emilio Alarcos o Álvaro Galrnés, neto que d'autores d'una emerxente xeneración d'investigadores asturianos como Xosé Lluís García Arias, Ana María Cano y otros. A otru sen, de les aules de la mesma Universidá d'Uviéu salieron

¹ MARÍA JOSEFA CANELLADA, *El bable de Cabranes*, Madrid (CSIC, Revista de Filología Española, anexo 31), 1944 (reimp., Uviéu [Academia de la Llingua Asturiana], 1996).

² El merechu homenaxe que les instituciones asturianas tributaron a esta autora en 2001 pon a la disposición del interetáu un ampliu volume nel que s'esbilla la valiosa contribución de Canellada a la filoloxía y les lletres asturianes: XUAN CARLOS BUSTO CORTINA (coord.), *M.ª Joséfa Canellada 1913-1995*, Uviéu (Principáu d'Asturies), 2001.

per estos mesmos años la mayor parte de los nuevos autores literarios en llengua asturiana, una fecunda xeneración que tien nel so haber, entre otros logros, el méritu de tener algamaos, quizás pela primer vez na historia de les nueses lletres, la reconocencia a la creación poética n'asturianu fora de les propies fronteres.

L'espoxigue que conoz la filoloxía asturiana dende los años 60 y los avances nel conocimientu científicu del asturianu algamaos pola acumulación d'estudios, pola actualización de los métodos d'análisis lingüísticu y pol nuevu marcu sociolóxicu xeneráu cola fin de la dictadura franquista, derrompió-y camín a una creciente demanda de presencia de la llengua nos programmes d'estudiu ya investigación de la Universidá d'Uviéu, como encontu esencial de cualquier proyectu creyible de recuperación lingüística. Ello ye que los primeros estatutos democráticos de los que se dota la Universidá d'Uviéu ya faen reconocencia explícita de la llengua asturiana, una y bones recueyen, nel so articulu 6, que «La Universidad de Oviedo, por su vinculación histórica, social y económica al Principado de Asturias, dedicará especial atención a los aspectos culturales e intereses colectivos de Asturias. La Lengua Asturiana tendrá el tratamiento adecuado, de acuerdo con la legislación. Nadié será discriminado por razón de su uso».

Dende'l puntu de vista docente ya investigador, un primer ensayu tuvo llugar col *Seminariu de Llingua Asturiana* entamáu na nueva universidá en 1977-78 nel qu'andecharon filólogos d'Uviéu y d'otres universidaes¹¹. Sicasí, hubo qu'esperar a los planes de estudio de 1984 p'afituar, pela primera vez, una asignatura específica tocantes al asturianu, que foi la que, en quintu cursu de la licenciatura de Filoloxía Románica, foi denominada xenéricamente *Filología Asturiana*. Darréu, entamó im-

¹¹ Les sos conclusiones fueron recyeltas nos dos volumes de *Esmales y Trabayos del Seminariu de Llingua Asturiana*, Uviéu (Universidá d'Uviéu), 1978-79.

partirse na Escuela Universitaria de Maxisteriu l'asignatura *Lengua Asturiana*, como optativa nos estudios de formación de profesoráu.

Por embargu, pelos mesmos años engáñense notablemente la polémica lingüística dientro de la Universidá d'Uviéu, en bona medida a les resultes de les encxes engarradielles personales ente les distintes personnes implicaes y que llevaron a figures significatives del gobiernu universitariu a una actitú roccana cuando non abiertamente intolerante contra la normalización de los estudios asturianistes. El puntu más ingriente d'estes disputes foi de xuru la sorprendente resolución de la oposición a la Cátedra de Dialectología Hispánica, celebrada na Facultá de Filoloxía n'ochobre de 1987, na qu'el tribunal alcordó, por rara unanimidá, refugar al candidatu Xosé Lluis García Arias, presidente daquella de l'Academia de la Llingua Asturiana y uria de les cabeces visibles de la investigación filolóxica asturianista⁶.

Otres frustraciones na normalización académica de la llingua asturiana tuvieron llugar daquella con menor impactu social y mediáticu que l'episodiu anterior. La incipiente xera docente ya investigadora entamada nos ochenta na universidá asturiana complementárase con una interesante y novedosa iniciativa editorial que, dende'l mesmu ámbitu universitariu, respón por dar a la lluz títulos esenciales de la filoloxía asturiana, tanto de la so tradición pasada como de la investigación actual. Refiérome a la *Biblioteca de Filoloxía Asturiana*, entamada y dirixida pol profesor Juan Carlos Villaverde Amieva dende 1987, y que bien asoleyao de magar entós hasta 1993 cinco títulos⁷. Esta iniciativa,

⁶ Otra mente, García Arias solicitara (apelando a problemes d'esembla personal) la impugnación d'esti tribunal, integráu por delles personnes manifiestamente beligerantes contra'l procesu de normalización lingüística, como yeren Emilia Alarcos, la so mujer, Josefina Martínez, Gregorio Salvador Caja, J. González Cuenca y Agustín Verr Luján.

⁷ Siendo'l primeru'l citáu trabayu de MUNIÑO (cf. supra nota 11) aciendes de FRITZ KATZEN, *Palabres y cosas del Suroeste de Asturias. Tres estudios*, introducción de Xosé Lluis García

que nun tenía antecedentes na Universidá d'Uviéu, foi igualmente tronzada, tanto pola actitú represiva de les autoridaes universitaries como quiciabes pola falta d'un sofitu decidiu por parte d'otros sectores, de manó, más receptivos a esta llinia de trabayu ya intereses intelectuales. Quedaron d'esta miente ensin publicar trabayos orixinales y traducciones d'autores como Ramón Menéndez Pidal, Yakov Malkiel, Alfonso García Leal y otros. De magar entós, nun s'entamó na Universidá d'Uviéu nenguna otra iniciativa editorial asemeyada.

En 1996, nos nuevos planes d'estudiu enanchóse la ufierta docente de llingua asturiana, non yá calteniendo la dicha asignatura de la llicenciatura de Filoloxía Románica (agora col nome de *Asturiano: estudio diacrónico del asturiano*) sinón amestando, dentro del grupu de *Tercera lengua y su literatura*, dos niveles de llingua asturiana, como optativa, en segundu y tercer cursu de la llicenciatura de Filoloxía Española. Esta última asignatura foi, de magar la so implantación, una de les más demandaes polos estudiantes.

Coles mesmes, dende 1994 funcionen al abellu de la Extensión Universitaria Cursos d'Especialista y Espertu Universitariu en Filoloxía Asturiana, dentro de la ufierta de títulos propios de la Universidá d'Uviéu. Estos cursos tienen, dende l'entamu, un importante seguimientu por parte de los estudiantes y, son de fechu, la base de la formación de profesoráu de llingua asturiana n'otros niveles del sistema educativu.

Arxos: Uviéu (Universidá d'Uviéu, Biblioteca de Filoloxía Asturiana, 2), 1987; XOSÉ LUIS GARCÍA ARIAS, *Contribución a la gramática histórica de la lengua asturiana y a la caracterización etimológica de su léxico*, Uviéu (Universidá d'Uviéu, Biblioteca de Filoloxía Asturiana, 3), 1988 (obra que recueye'l proyecto d'investigación presentáu por esti autor al mencionáu concurso de la Cátedra de Dialectología Hispánica del añu anterior); CARLOS GONZÁLEZ DE POSADA, *Diccionario de algunas voces del dialecto asturiano (1788) y otros papeles*, edición de Xosé Luis García Arias, Uviéu (Universidá d'Uviéu, Biblioteca de Filoloxía Asturiana, 4), 1989 y RAMÓN D'ANTRÉS DÍAZ, *Encuesta sociolingüística mensual parroquial asturiana (Dena-Xixón)*, Uviéu (Universidá d'Uviéu, Biblioteca de Filelooxía Asturiana, 5), 1993.

El progresivu desarollu de los estudios de filoloxía asturiana na Universidá d'Uviéu tendría, como la so más lóxica culminación, la creación d'una llicenciatura específica de Filoloxía Asturiana, según ye demandada de manera xeneral por profesores y estudiantes de la nuesa universidá (nun ambiente, nos últimos años de mayor consensu interno sobre esti tipu d'estudios) y asumida pola mayor parte de la sociedá asturiana y la totalidá de les sos fuercies polítiques más representatives. Lamentablemente, esta llicenciatura vien siendo sistemáticamente vetada na llamada Subcomisión d'Humanidaes del Conseyu d'Universidaes d'España (en 1996 y darréu en 2001), magar les reiteraes solicitudes de la Universidá d'Uviéu y de la Xunta Xeneral del Principáu d'Asturies, y los distintos avales qu'enconten esi proyectu de llicenciatura por parte d'otres universidaes y centros d'investigación españoles y europeos o, más de recién, pola resolución nel mesmu sen, tomada por asentimientu, de la Conferencia de Decanos de Lletres d'España.

La represión de los estudios d'asturianu na Universidá d'Uviéu algamó'l so más altu cumal en 2002. Les últimes reformes afalaes pol Ministeriu d'Educación nel conxuntu de la universidá española forzaron a la Facultá de Filoloxía d'Uviéu a modificar los planes d'estudiu vixentes. Dichos cambios yeran puramente axustes de tipu técnico y nun debien afectar los conteníos académicos, que yeran los mesmos previamente aprobaos. Sicasí, n'abril de 2002 un curtiu fax unviáu pol Conseyu d'Universidaes d'España argumentaba «razones reiteradamente expresadas» a la de suprimir les asignatures de *Filología Asturiana* y *Lengua Asturiana* vixentes hasta entós, cola amenaza de nun homologar en conxuntu del estudiu español les titulaciones de Filoloxía Hispánica y Filoloxía Románica d'Uviéu.

Tien que s'apuntar que si eses asignatures taben siendo impartíes, yera porque, de mano, foren aprobaes pol mesmu organismo que, agora, lliteralmente, les prohibía bajo coacciones. Poro, eses «razones reiteradamente expresadas» citaes en fax, en rigor, nun esistien, sinón

que se procedía a una prohibición puramente arbitraria, afalada dende sectores de la propia Universidá d'Uviéu, minoritarios pero influyentes y con accesu directu a les actuales autoridaes polítiques del Principáu d'Asturies, manifiestamente conivientes nesta cuestión cola exura burocracia del ya obsoletu Conseyu d'Universidades.

El llector d'esta revista (al que ye abondo supone-y una formación llingüística mínima) sacrá evaluar por él mesmu l'altor científico de l'argumentación emplegada nel acta correspondiente de la Subcomisión d'Humanidaes del Conseyu d'Universidaes a la de negar la licenciatura de Filoloxía Asturiana en 2001 con razones como que «las diferencies ente lenguas y dialectos son bien conocidas» o «habría que demostrar previamente que la lengua asturiana es una lengua en sentido filológico» (*sic!*)¹⁸.

Pela mio parte, esta nota sobre la historia universitaria del asturianu nun tenía otru enfotu qu'amosar cómo l'interés eruditu y científico pola llengua de los asturianos forma parte d'una llarga y sana tradición intelectual de la Universidá d'Uviéu y de la sociedá asturiana en xeneral.

¹⁸ Esta comisión taba integrada por los rectores Josep Nadal Farrerons (catedralgu de Filología Románica na Universidá d'Girona), Rafael Puyol Antolín (catedralgu de Xeografía de la Universidá Complutense de Madrid), Darío Villanueva Prieto (catedralgu de Teoría de la Literatura de la Universidá de Santiago de Compostela), Antonio Ramírez de Verger (catedralgu de Filología Llatina de la Universidá de Huelva), Manuel Lobo Calhem (catedralgu d'Historia de la Universidá de Las Palmas), José Cárdenas Solino (catedralgu de Filología Inglesa de la Universidá de La Laguna), Luis García Moreno (catedralgu d'Historia de la Universidá d'Alcalá de Henares), Vicente Ortega Casto (catedralgu d'Inxeniería de Telecomunicaciones de la Universidá Politécnica de Madrid), na te condición de secretario del Conseyu d'Universidaes) y María Soledad Iglesias (catedralgu d'Historia Moderna de la Universidá de Valladolid). La mención a estos personajes nun presupón la so afiliadía colu actitú repressiva xeneral que se deduz de la resolución, una y bones ésta nun foi aprobada por unanimidá, habiendo dientro de la subcomisión pronunciamientos favorables a la Filología Asturiana. Ye, sicasí, públicamente conocida la postura especialmente beligerante de Darío Villanueva, gracies, entre otros causes, a la indiscrección de los sos amissacos asturianos.

de la que participaron nos últimos cuatro sieglos delles de les sos personalidaes más relevantes de la so cultura. Otra manera, la mio postura al respectu ye bona de suponer y, nel so casu, el llector sabrá prevénise énte ella. Cuento, sicasí, que l'actual estáu de les idees llingüistiques fai innecesaria cualquier argumentación adicional al serviciu de los nuesros intereses más particulares. Efectivamente, la llingüística moderna tiene ente los sos postulaos fundamentales la reconocencia del interés valor epistémicu de toa llingua humana, pol puru fechu de selo, y la esencial igualdá de toes elles, desque niega cualquier fundamento científicu a ciertos prejuicios ancestrales sobre la xerarquía de llingües, desplazándolos definitivamente al terrén ideolóxicu, al apriorismu clasista, nacionalista o de cualquier otru xéneru o, simplemente, reduciéndolos a una cuestión d'ignorancia.

Claro que, a última hora, tamién podía pasar qu'estos postulaos universales de la llingüística moderna tampoco nun acabaren de presa-yos a los miembros del Conseyu d'Universidaes, polo que quiciabes vagara la pena recordar la esistencia d'otros principios esenciales de la vida académica como los de llibertá de cátedra y autonomía universitaria, que ye precisamente lo que vulneren estes resoluciones al pretender imponer un determináu enfoque sobre la realidá llingüística asturiana y escluyir espícitamente otros posibles que, por cierto, son anguaño los mayoritarios. Había ser abondo con apelar, nesti puntu, a la pura ética científica de la que supuestamente participa tola comunidá universitaria y abogar d'esta miente por un debate científico llibre y plural. A nun lo ser, quiciabes tenga que se pasar a considerar la esistencia d'una rica llexislación que defende con firmedume talos principios¹⁰, dende l'artículu correspondiente de la Constitución Española

¹⁰ Fal casu qu'esta cuestión (cosu remisión concreta y sobre datos documentales bien prejuecos a la situación actual del asturianu na Universidá d'Uviéu y a la tuerbo trama burocrática y política) analíusase con detenímentu nel dossier aviu por mio mesmo col titulu «Informe sobre

de 1978, hasta los propios estatutos de la Universidá d'Uviéu, por cierto, oxetu d'un procesu de revisión y reforma de la que se redacten estes llinies, nel que ye bien inciertu'l tratamientu que pretende acutáse-y a la llingua asturiana.

Evidentemente, nun ye l'oxetu d'estos apuntes pensaos pa una llamada *Revista de Filoloxía Asturiana* entrar en considerances de tipu xurídicu nin n'alderiques de calter ideolóxicu, pero dende un puntu de vista puramente filolóxicu la so pertinencia abúltanos fora de dudas una y bones les arbitrarias ya indignantes decisiones del Conseyu d'Universidaes sobre los estudios de llingua asturiana son, irónicamente, eso: historia de la llingua asturiana. Y como talo, materia susceptible d'estudiu, tamién na Universidá, si l'autoridá nun lo prohibe.

Las últimas actuaciones del Consejo de Universidades con relación a los estudios universitarios de lengua y filología asturianas», de próxima presentación pública.